

Untervazer Burgenverein Untervaz

Texte zur Dorfgeschichte von Untervaz



2023

Lebenslauf von Marili Bürkli-Senti

Email: dorfgeschichte@burgenverein-untervaz.ch. Weitere Texte zur Dorfgeschichte sind im Internet unter <http://www.burgenverein-untervaz.ch/dorfgeschichte> erhältlich. Beilagen der Jahresberichte "Anno Domini" unter <http://www.burgenverein-untervaz.ch/annodomini>.



Lebenslauf von
Marili Bürkli-Senti
(03.08.1934 – 29.08.2023)

Lebenslauf von Marili Bürkli-Senti (03.08.1934 – 29.08.2023)

Im Nama vor Truurfamilia möchte i eu über z'Läba vom Marili verzella.

Si isch als ältischi vo sechs Kinder am 03. August 1934 am Flumser Grossberg uf d'Welt cho. Döt isch z'Marili ufama chliina Buurahof ufgwacha und het zäma mit da Gschwüscherti iahri Kindheit und Schualziit verbrocht.

Schu früah het sie müassa ufam elterliche Hof mitapacka. Als jungi Frau isch sie denn bi verschiedana Arbeitgeber z'eigna Geld go verdiana. Unter anderem au bim Vehhändler Meier in Unterterza, wo sie denn au iahra gliabti Crispin kennaglernt hät.

Im Johr 1959 hän dia Beida iahri grossi Liabi mit dr Hürot in dr Kapella Gasella am Flumser Grossberg besiegelt. Dr Flumserberg het z'Marili bis zum Schluss im Herza treit, obwohl sie noch dr Hochziit gmeinsam do z'Vaz as Dahai gfunda hen. No im gliche Johr isch dr Hanspeter uf d'Welt cho und a guats Johr spöter dr Markus. Dära chliina Familia sin denn no zwei wiiteri Kind gschenkt worda, im 1963 d'Marianne und drei Johr spöter d'Irma. Duazmol isches sicher nid immer eifach gsi mit vier Kind. Doch sie het üs allna a glückliche Kindheit ermöglicht und z'Marili isch a herzensguati Mama gsi.

Krampfet het sie immer. In da Lööser het sie sich wohl gfühl, säaa, jäta, ernta, das isch iahri gross Liidaschaft gsi. Nebadra het sie viel Johr in dr Milchzentrala Untervaz gschaft, wo sie als letschi "Vazer Joghurt" härgstellt het. Spöter het sie bis zur Pension d'Metzgerei Ryser unterstützt und somit a grossa Biitrag zum Lebensunterhalt gleischtet. Drum hen z'Marili und dr Crispin im 1983 in dr Hintergass a Liegaschaft erwerba und döt a neus, liebevolls Dahai baua chöna.

Neba all däm het sie sich Ziit gno, zum im Fraua- und Bürinnaverein aktiv mit z'helfa. Dr kollegiali Zämahalt mit da andera Fraua isch iahra wichtig gsi. Erhola und Kraft schöpfa, das het sie am beschta am Vazer Berg chöna. Im Pazzig hen miar menga Jass klopft und g'würflet mitanand. Aber ni nu das het iahra Freud gmacht, sondern au dia stetig wachsendi Familia. Dia grossa Geburtstags- und Wiahnachtsfeschter, dr Bsuaach vo Enkel und Urenkel und dr guat Zämahalt in dr Familia hen iahra sehr viel bedütet und immer as Lächla ins Gsicht zauberet.

In da letschta Johr isch z'Läba vom Marili us gsundheitlicha Gründ schwerer worda. Noch langer und intensiver Pfleg vom Crispin, het sie im März 2023 im Alters- und Pflegeheim am Bach in Wangs as Plätzli gfunda, zum döt iahra letscht Läbensabschnitt z'vebringa. Somit isch sie wieder in dr Nöchi vo iahrer gliabta Heimat gsi.

Vom Sturz am 19. August 2023 het sich z'Marili leider nüma erholt und het zehn Täg spöter sanft und friedlich ischlofa chöna. Zruck blieben Truur, Schmerz und a grossi Leeri, aber au Dankbarkeit für d'Erlösig, für dia gmeinsama Johr und die glücklichha Stunda mit iahra. Dia werden immer in üsera Erinnerung blieba.

"Unser Herz will dich halten.

Unsere Liebe dich umfängen.

Unser Verstand muss dich gehen lassen, denn deine Kraft war zu Ende und deine Erlösung Gnade."

Mama miar sägen diar vo Herza Danka!

Miar gsehn üs wieder.